

四庫全書

經部

欽定四庫全書

經部

毛詩類釋卷

七

詳校官監察御史

臣莫瞻菴

刑部郎中

臣

許兆椿覆勘

總校官進士

臣朱

鈐

校對官編修

臣施培應

應

謄錄監生

臣

郭道藩

欽定四庫全書

毛詩類釋卷三

國子監祭酒顧棟高撰

釋山

岐山

郡縣志岐山亦名天柱山在今陝西鳳翔府岐山縣北  
十里雍錄邠在岐西北二百五十里自邠而南一  
百三十里為奉天縣有梁山渭水在梁山之南踰梁

山循水可以達岐所謂率西水潄至于岐下也太王都岐在今鳳翔府西五十里是為岐周岐水之南有周原

名勝志周原在岐山縣東四十里東西橫亘肥美寬平即詩所謂周原膴膴者也地在岐山之陽故左傳曰成有岐陽之蒐

終南

一名太白山在今陝西西安府長安縣南五十里亘鳳

翔岐山郿縣武功盩厔鄠縣長安咸寧藍田九縣之境秦風終南何有有條有梅時襄公僅以兵一至岐而卒子文公立十六年始將兵伐戎戎敗走取周餘民而有之地至岐岐以西獻之周是襄公終身未嘗一至終南特以天子之命設言以勸其必取耳

臣謹案終南一名中南以其據天之中在都之南也昔文王都豐武王都鎬皆面終南山以土田則上腴形勢則輿區故文王詩曰殷其雷在南山之

陽成王詩曰信彼南山宣王詩曰幽幽南山幽王  
詩曰節彼南山皆據朝夕所見而言自終南入秦而  
西歸之好音斷矣鄒肇敏謂秦能以一國取之周  
獨不能以天下取之乎平王此時已甘棄祖宗百  
年之基業此匪風之詩人所為嘆息痛恨也

閻氏若璩曰詩咏南山其可指實者凡二一為曹南  
山郡縣志在曹州濟陰縣東二十里曹風南山朝隲  
是也今為山東曹州府曹縣一為終南山郡縣志在

京兆府萬年縣南五十里今為陝西西安府長安咸  
寧藍田藍屋四縣

北山

胡氏渭曰終南之名惟見於秦風而小雅則稱南山不  
一而足又有北山蓋南山謂都南諸山終南太一在  
焉北山謂都北諸山九畹甘泉截薛等也

臣謹案召南陟彼南山言采其蕨小雅陟彼北山  
言采其杞不舉山名單稱南北者主豐鎬帝都而

言

東山

豳風我徂東山嚴氏粲曰三監在州之東周公自西徂東以征之軍屯必依山為固故以東山言之

梁山

在今陝西同州府韓城縣西北九十里大雅奕奕梁山維禹甸之本為韓國鎮山晉滅韓其地屬晉

臣謹案此與太王踰梁山之梁山有別太王所踰



之梁山在岐山之西百二十里韓國之梁山在岐山之東北七百里是秦晉接界處近大河公羊傳梁山崩壅河三日不流是也周之立國以岐山為根本終南為屏蔽梁山為門戶韓侯作鎮實為國之屏翰詩謂幹不庭方以佐戎辟其倚毗可知乃平王東遷晉文侯即滅韓而有之周失其門戶之險而晉且代周而興霸矣

閻氏若璩曰雍州有二梁山一在今韓城郃陽兩縣

境書治梁及岐詩奕奕梁山春秋梁山崩爾雅梁山  
晉望也皆與孟子之梁山無涉孟子梁山則在今乾  
州西北五里其山橫而長自邠抵岐二百五十餘里  
山適界乎一百三十里之間太王當日必踰此山然  
後可以遠狄患而營都邑改國曰周古諸侯國名雖  
云受之天子傳之祖宗而隨在易名初不以為嫌如  
唐叔虞一傳而子變改國曰晉魏侯瑩遷於大梁改  
國曰梁皆是也後秦始皇幸梁山宮從山上見丞相

車騎甚衆弗善亦此乾州之梁山

敖山

在今河南開封府鄭州河陰縣西二十里車攻詩所謂  
搏獸于敖者也秦於其地置倉名曰敖倉北臨汴水  
先王名山大澤不以封敖山不屬列國蓋留以為  
講武之地宣王時猶行此典自鄭滅虢檜而敖遂為  
鄭之山險東都朝會田獵之禮不行矣

泰山

在今山東泰安府城北五十里史記貨殖傳其陽則魯其陰則齊詩曰泰山巖巖魯邦所詹此魯之泰山也

嶽

臣謹案嶽吳嶽也崧乃高大之稱爾雅山大而高曰崧釋名云崧竦也所以毛傳只說高貌中庸言載華嶽而不重華則華山嶽即此山也即禹貢之岍山一名吳岳地理志扶風岍縣西有岍山沂水所出在今陝西鳳翔府隴州南八十里與中嶽嵩

高無涉閭若據四書釋地云華嶽舉二山與下河  
海對周禮豫州山鎮曰華雍州山鎮曰嶽爾雅釋  
山河南曰華河西曰嶽確有明據武進楊椿謂臣  
曰申侯係雍州產非豫州產也可謂一語破的况  
經文明謂維嶽降神生甫及申不云崧高降神又  
何來太室之名乎 又案吳嶽亦有五嶽之號鄭  
注大司樂云五嶽岱在兗州衡在荊州華在豫州  
嶽在雍州恒在并州是也爾雅及經典羣書言五

岳者皆數高高不數嶽而鄭云然者賈公彥周禮  
疏云周處鎬京在五嶽外西都無嶽故權立吳嶽  
為西岳爾雅嵩高為中嶽華山為西嶽者據東都  
地中而言此據西都以嵩與華山俱屬豫州雍更  
無嶽名故以吳嶽為西嶽也 毛鄭皆以嶽為四  
嶽意以申甫皆姜姓堯時四嶽之後嶽神福佑其  
子孫故生申伯與甫侯嚴緝已非之謂詩主褒揚  
申伯而遠引周道始衰之甫侯為配非褒揚之意

此甫當為仲山甫宣王時為相與申伯均有蕃宣  
之任况鄭氏注禮既以甫為仲山甫何乃箋詩忽  
異嚴說是也竊以詩單舉嶽字自當指雍州之嶽  
山無疑舉近地之尊神為言從來神靈降生只是  
一神之靈氣所注無四嶽之神皆來降生之理指  
為中嶽者固屬謬以為四嶽者尤為鹵莽也唐  
六典闕內道名山曰吳山亦謂之西鎮山肅宗在  
鳳翔改吳山為西嶽以祈靈助適與周禮大司樂

之注相合

胡氏渭曰古之中嶽蓋霍太山在山西平陽府霍州東三十里禹貢之所謂太岳也隋開皇十四年詔以霍山為冀州鎮歷代因之號為中鎮降嶽為鎮為嵩高所壓耳閻若璩云詩崧高維嶽謂崧然而高者維是嶽山非以太室山為嶽名曰嵩高也爾雅撰於三百篇後緣此遂實指嵩高為中嶽太史公又出爾雅後并補注堯典曰中岳嵩高也至漢武登禮太室易



曰密高中岳名益顯皆由為爾雅所誤耳

### 首陽

在今山西蒲州府城東南一名雷首山禹貢壺口雷首  
至于太岳亦曰首山春秋傳趙宣子田於首山皆此  
也詩曰采苓采苓首陽之巔時當晉獻公已屬晉案  
蒲坂本舜都首山在河東蒲坂縣南山南曰陽夷齊  
采薇於此墓在縣南三十五里蒲坂今為蒲州府永  
濟縣

龜山

在今泰安府新泰縣西南四十里春秋定十年齊人來歸鄆謹龜陰田謂此山之北田也詩曰奄有龜蒙蓋此時尚未奪於齊

蒙山

在今沂州府蒙陰縣西南孔疏曰論語說顓臾云昔者先王以為東蒙主何楷曰蒙山一名東山孟子謂登東山而小魯是也

鳧山

王應麟曰郡縣志鳧山在兗州府鄒縣東南三十八里

繹山

繹亦名嶧李氏樗曰禹貢徐州嶧陽孤桐此繹即嶧陽也一名鄒山文十三年邾文公卜遷于繹哀八年邾衆退保于繹杜注魯國鄒縣北有繹山在今兗州府鄒縣東南二十二里郭璞曰繹山純石積構連屬如繹絲然故名詩保有鳧繹明係魯地而易世之後即

為邾都終春秋世沒於邾境豈詩係頌禱之詞固不  
必有實耶

徂來

水經注鄒山記曰徂來山在兗州梁父奉高博城三縣  
界詩曰徂來之松新甫之栢今其地猶有美松

新甫

後魏地形志魯郡汶陽縣有新甫山汶陽故城在今兗  
州府泗水縣東南

景山

商頌陟彼景山松柏丸丸朱子曰景山商所都之山名  
在今河南府偃師縣所謂北亳也

旱麓

地理志漢中郡南鄭縣旱山池水所出東北入漢 詩  
緝曰毛氏以旱為山名不知山之所在或取漢地理  
志漢中郡南鄭縣之旱山以實之詩人托山川以起  
興皆取其在境內者漢中遠於豐鎬豐鎬之間高山

多矣何獨遠取漢中之旱山乎既非耳目所及何言  
瞻也旱山不知所指闕其所不知可也

岡

爾雅山脊曰岡郭注謂長山脊邢疏高山之長脊名岡  
詩云陟彼高岡是也

冢  
萃

爾雅山頂曰冢郭注山巔萃者屢屢

音垂  
怡

郭注謂峰頭

巉巖也邢疏此二句釋小雅十月云山冢萃崩之文

也毛傳云山頂曰冢鄭箋云萃者崔嵬雖音字小異義實同也

墮

爾雅巒山曰墮郭注謂山形長狹者荊州謂之巒邢疏凡物狹而長謂之墮山形亦如之周頌般篇云墮山喬嶽是也

鮮原

爾雅小山別大山曰鮮郭注別者不相連邢疏謂小山

與大山不相連屬者名鮮大雅皇矣度其鮮原毛傳  
引此文解之下文居岐之陽則是岐為大山鮮原為  
小山與岐不相連屬闕駟以為此即周之程邑也孔  
疏曰太王初遷已在岐山此亦在岐山之陽是去舊  
都不遠也文王中間徙宅於程後更徙都於豐知此  
非豐者以此居岐之陽豐則更在岐之東南三百里  
耳

夕陽



爾雅山西曰夕陽郭注暮乃見日邢疏夕始得陽故名夕陽大雅公劉云度其夕陽豳居允荒是也

朝陽

爾雅山東曰朝陽郭注旦即見日邢疏山頂之東皆早朝見日大雅卷阿云梧桐生矣于彼朝陽是也

崔嵬 硎

爾雅石戴土謂之崔嵬郭注石山上有土者土戴石為硎郭注土山上有石者邢疏周南卷耳云陟彼崔嵬

又云陟彼岵矣毛傳崔嵬土山之戴石者石山戴土  
曰岵與此相反或是傳寫之誤也

岵

岵

爾雅作岵

爾雅多草木岵無草木岵岵疏岵當作岵魏風云陟彼  
岵兮瞻望父兮又曰陟彼岵兮瞻望母兮毛傳山無  
草木曰岵有草木曰岵與此相反者當是傳寫誤也

王肅解依爾雅

岵

爾雅重甌

音嚴

郭注山形如累兩甌甌也山形似之

因以名云邢疏孫炎云山基有重岸也甌是無底甌  
大雅篤公劉曰陟則在巘巘與甌同毛云小山別於  
大山與此異孔疏爾雅說重甌謂山形如累兩甌上  
大下小西京賦曰陵重甌是也與皇矣小山曰鮮義  
別彼謂大山之傍別有小山也

崧

爾雅山大而高曰崧郭注今中嶽嵩高山蓋依此名李

巡曰山之高大者自名崧本不指中嶽今之中嶽名  
嵩高或取此文以立名乎胡氏渭曰蓋疑詞亦不以  
詩之崧高為中嶽也自劉熙釋名云嵩或為崧世遂  
以降神生甫專歸之中嶽錯解貽誤至於如此左傳  
昭四年司馬侯曰四嶽三塗陽城太室太室即嵩高  
於四嶽外別言之亦可見當時不為嶽也爾雅嵩高  
為中嶽蓋後人所附益耳

附釋丘

旄丘

爾雅前高曰旄丘郭注詩云旄丘之葛兮毛傳前高後下曰旄丘李巡云前高者後必卑下

阿丘

爾雅偏高曰阿丘郭注詩云陟彼阿丘邢疏謂丘形四隅有一高而不正在左右前後者名阿丘

宛丘

爾雅宛中曰宛丘郭注宛謂中央隆高邢疏案詩陳風

宛丘之上兮毛傳云四方高中中央下曰宛丘李巡孫  
炎亦皆云然而郭以為中央高者以四方高中中央下  
即是上文水潦所止之泥丘又下云丘上有丘曰宛  
丘非中央隆高而何臣謹案中央隆高與宛字義不  
合經文明言宛中是其中央宛宛然況地形高峻非  
可游蕩之處不如從毛說為長也

畝丘

爾雅如畝曰畝丘郭注丘有隴界如田畝邢疏田畝之

壟丘形有界埒似之因名詩小雅巷伯云楊園之道  
猗于畝丘是也

京

爾雅絕高謂之京郭注人力所作邢疏言卓絕高大如  
丘而人力所作者名京非人為之而地自然生者則  
名丘京與丘相對則是人為之京大雅篤公劉詩乃  
覲于京鄭箋引此文孔疏曰此京是大丘非人為矣  
李廵曰丘之高大者曰京是京有二等若戰勝取尸

築為京觀者則人為之此言京者則是丘之高大非人為也

毛詩類釋卷三



欽定四庫全書

毛詩類釋卷四

國子監祭酒顧棟高撰

釋水

漆水 沮水

縣詩民之初生自土沮漆此豳地之漆沮也水經漆水出扶風杜陽縣程大昌曰杜楊今岐山普潤縣之地其水入渭在澧水之上與禹貢序渭水節次不合

許氏謙曰山海經獮次之山漆水出焉北流注于渭  
郭氏注漆水出岐山詩云自土沮漆是也寰宇記漆  
水源出鳳翔府普潤縣東南東及周原之北岐山之  
南是為太王之邑故詩曰居岐之陽在渭之將其地  
山固名岐而山南有水亦名岐也岐漆渭三水同流  
則岐水之陽即漆水之陽也故頌曰猗與漆沮潛有  
多魚毛氏釋之曰漆沮岐周之二水其說是也

臣謹案據許氏說則縣詩潛頌之漆沮皆指岐周

而言非禹貢之漆沮明矣孔疏潛詩曰漆沮自豳  
歷岐以至豐鎬以其薦獻所取不宜遠於京邑故  
不言豳言岐周者鎬京去岐不遠故繫而言之豳  
今同州府邠州岐今鳳翔府岐山縣周今西安府  
鄠縣東西凡五六百里

吉日詩漆沮之從天子之所此禹貢之漆沮也漆水自  
耀州同官縣東北界來經華原縣合沮水沮水出坊  
州昇平縣北子午嶺至耀州華源縣合漆水至同州

朝邑縣東南入渭漆沮一名洛水與縣詩自土沮漆有別地理考異引段氏云漆沮有二皆出雍州皆入于渭特有上流下流之別詩自土沮漆在岐周之間是渭之上流也書東過漆沮叙於澧涇之下是渭之下流也許氏謙曰案寰宇記鳳翔府東至長安三百一十九里長安東至同州二百八十里則二水入渭之地相去六七百里非一漆沮明矣雖岐下入渭之沮不可考其源委然決非至華原合漆之水也

# 洛水

瞻彼洛矣之洛即吉日之漆沮漆沮一名洛水此即夏官職方氏雍州其浸渭洛與伊洛之洛有別伊洛之洛在東都此在鎬京故毛氏以洛為宗周之浸水伊洛之洛禹貢所謂導洛自熊耳源出商州上洛經王城至虎牢入河此至同州朝邑入渭也胡氏渭曰禹貢豫有洛而雍無洛洛水之名昉於殷周之際周禮雍州之浸曰渭洛詩瞻彼洛矣維水泱泱周語幽

王時三川震韋昭注曰涇渭洛也史記周本紀西伯  
獻洛西之地於紂晉世家文公攘戎狄居於河西圖  
洛之間魏世家築長城自鄭濱洛以東有上郡皆雍  
州之洛非豫州伊洛之洛也 程大昌雍錄洛水出

北地郡歸德縣北蠻夷中

今慶陽府治安化縣東北  
百七十里即洛水之源

自入塞後經廊坊同三州至同州白水縣

白水即沮水

與

漆沮合混為一流以入于渭故孔安國班固以後皆

指懷德

今朝邑縣

入渭之水為洛是三水本分三名而曰

洛即漆沮者言其本同也

涇水

涇水出陝西平涼府平涼縣筭頭山

平涼本漢之涇陽縣地獫狁所侵即

此非今之涇陽縣也

東逕華亭縣東北又東逕涇州北又東逕

長武縣北汭水入焉又東南逕邠州淳化永壽醴泉

涇陽高陵縣西南入于渭

汭水

汭詩作芮芮水出今平涼府華亭縣有二源北源出湫

頭山之朝那湫南源出齊山至縣東與北河合又東  
至涇州西北入涇水周職方雍州其川涇汭詩曰芮  
鞠之即皆此也若禹貢涇屬渭汭之汭孔傳則以水  
北曰汭言治涇水入于渭也下文漆沮既從即從于  
渭澧水攸同即同于渭皆主渭言之故與詩之大雅  
及周職方有別

渭水

渭水出陝西蘭州府渭源縣西烏鼠山東逕鞏昌府鳳



翔府岐山縣南

為周西岐

又東南逕扶風縣郿縣武功盩

厓興平鄠縣北

為周豐邑

又東逕咸陽縣豐鎬二水自南

入焉又東逕西安府治北又東逕高陵縣南涇水自

北來入焉又東逕臨潼縣北漆沮二水自北入焉又

東逕渭南縣華州華陰縣北洛水入焉

洛水即詩瞻彼洛矣之洛

尚書孔傳漢書顏注並以洛水為漆沮之水按秦漢

時關中有鄭白二渠沮水始循鄭渠入渭古時沮水

洛水自各入渭未可指

洛為漆沮也詳見鉅指

又東入于河

胡氏渭曰小雅瞻彼洛矣傳以為宗周既浸之水亦

不言洛即漆沮謂漆沮亦曰洛水者實自安國書傳  
始而闕駟酈道元因之孔穎達復援以釋詩於是洛  
與漆沮合而為一水矣其濁水上承雲陽大黑泉名  
漆沮水者乃土俗之稱而洛水之為漆沮則先儒皆  
以為然故顏師古注漢書亦用其說然直路今延安府宜君  
縣之沮自櫟陽今西安府臨潼縣縣界合濁水分為二水一  
循鄭渠而東注洛其間二百餘里實鄭國之所開漢  
志云沮入洛亦據既有鄭渠後言之耳自鄭渠一廢

而濁水絕於三原沮水不抵富平可見此水在古時  
元合濁水至櫟陽入渭而不與洛通也

臣謹案漆出西安府同官縣沮出延安府宜君縣  
至耀州華原合流至同州府朝邑入渭者禹貢之  
漆沮也出鳳翔府扶風縣至西安府臨潼入渭者  
豳地之漆沮也兩漆沮入渭之處相去約二百五  
十里許氏謙以為五六百里係考之未的扶風之  
漆沮入渭蔡傳云在澧水之上澧在咸陽縣東南

三里入渭又在臨潼之東縣詩潛頌之漆沮出扶  
風縣吉日之漆沮出同官縣一名洛水洛水自有  
源至白水縣與漆沮合流遂總名之曰洛詩瞻彼  
洛矣之洛是也

澧水

澧水出西安府鄠縣東南自今長安縣界西北流逕咸  
陽縣東南三里注于渭詩曰澧水東注是也

汾水

汾水出山西太原府忻州靜樂縣北管涔山東南流逕  
太原縣東詩曰彼汾一曲是也歷汾州府平陽府至  
蒲州府之滎河縣折而入于大河

### 淇水

淇水出河南衛輝府輝縣之共山經淇縣境

紂朝歌地  
為衛都

流入濬縣宿胥口入河

### 百泉

今衛輝府輝縣西北七里有蘇門山山有百門泉泉通

百道衛風所謂淇水在右泉源在左者也

汶水

汶水桑欽以為出泰山萊蕪縣西南入濟載驅詩汶水  
湯湯魯道有蕩論語則吾必在汶上嚴氏粲曰汶在  
齊境自魯適齊必渡汶水

洙水

洙同濟出河南濟源縣王屋山毛詩鄭箋云衛自河以  
東夾於濟水孔疏曰濟自河北而南入于河又出而

東楚丘在其間故曰夾于濟水也詩出宿于泚王應麟曰地理志禹貢導沅水東流為泚東郡臨邑有泚

廟

洽水

詩在洽之陽洽水出陝西同州府郃陽縣今流已絕故去水而加邑渭水亦逕此入河也

汝水

詩遵彼汝墳汝水出河南汝州魯山縣東北經汝州南

陽府之裕州許州府之襄城郛城南至汝寧府又東南流至江南潁州府南而入淮

江水

江水出今四川成都府灌縣岷山東流至湖廣漢陽府大別山與漢水合東北至江南通州入海

漢水

漢水出今陝西漢中府嶓冢山南流至湖廣漢陽府江夏縣大別山入江今為漢口鎮



淮水

淮水出桐栢山在河南南陽府桐栢縣東一里至江南

淮安府安東縣入海

溱水

溱水出今開封府新鄭縣西北南入于洧水

洧水

洧水出今許州府密縣馬嶺山南過新鄭縣南與溱水

合

甫草

即圃田澤在今開封府中牟縣西北七里亦曰萑苻之澤周禮豫州藪曰圃田爾雅十藪鄭有圃田澤多產麻黃詩所謂東有甫草是也鄭武公定虢檜取其地為原圃僖三十三年皇武子辭秦客曰鄭之有原圃猶秦之有具圃即此

陳氏曰九州川浸澤藪名在職方不屬諸侯之版詩不以圃田繫鄭春秋不以沙麓屬晉略可觀矣周季

諸侯始擅不盼之利齊幹山海而桃林之塞郇瑕之地晉實私之甚者至周歲貢百二十金於魏以易溫圓而先王之制掃地盡矣

補傳曰圃田易野也易野以車為主故用以選車詩田車既好是也教險野也險野以人為主故用以選徒詩選徒囂囂是也

臣謹案甫草毛訓甫為大謂有廣大之草可以田獵即下章教地是也鄭破甫作圃謂即鄭之圃田

與教成兩地而嚴緝非之謂下章言獵于教地不  
得又言圍田呂氏祖謙及李氏樗許氏謙並同其  
說詳訂詁中朱傳從鄭說而補傳之言亦似有理  
姑並存之

大河

河自積石入中國至華陰經流蒲州府同州府中間為  
秦晉分界又東折經河南府洛陽縣北境所謂洛汭  
正當周王城之東北又過直隸大名府開州北為衛

境又北播為九河九河約在今山東德州以上直  
隸河間府數百里之地為齊衛分界詩曰河水洋洋  
北流活活蓋自衛適齊必渡河

泮水

泮水一名雩水源出曲阜縣治西南西流至兗州府城  
東入泗水詩所謂思樂泮水也水側有雩壇亦名舞  
雩雩門因此而名雩門魯南城之西門也在漢則靈  
光殿之東南即魯泮宮故址詳見水經注

臣謹案近世楊用修輩俱主此說然毛鄭孔三家皆云泮水泮宮之水也天子曰辟雍諸侯曰泮宮諸儒遵用之似不必更立異

肥泉

衛風我思肥泉茲之永歎傳曰所出同所歸異為肥泉爾雅疏曰小水支分歸入大海則異當其泉源初出則同流者名肥

寒泉 浚

通典寒泉在濮州濮陽縣東南浚城輿地廣記開封縣  
有浚溝詩所謂浚郊浚都也祥符縣北有浚水故邑  
名浚儀有寒泉阪詩爰有寒泉在浚之下是也寰宇  
記寒泉在縣西十里自兩漢迄五代並置浚儀開封  
二縣宋建都於此真宗時改浚儀為祥符縣與開封  
縣並為開封府治前明以開封省入祥符而寒泉故  
蹟不可復問矣

下泉

曹風列彼下泉浸彼苞稂傳曰下泉泉下流也爾雅一名沃泉沃泉縣出縣出下出也郭註從上流下

汎泉

小雅大東云有列汎泉傳曰側出曰汎泉爾雅汎泉穴出穴出側出也郭註從旁出也

檻泉

大雅瞻卬云威沸檻泉傳曰檻泉正出正出湧出也威沸出貌爾雅一名濫泉李巡曰水泉從下上出曰湧



泉春秋昭五年叔弓帥師敗莒師于瀆泉公羊傳云  
瀆泉直泉也檻濫音義同

水異名

水自江出為沱汝出為瀆詩江有沱遵彼汝瀆是也皆  
大水溢出別為小水之名

此係爾雅說毛詩作汝墳傳曰墳大防也謂厓岸  
狀如墳墓臣謹案水中無可伐條枚之理毛說較  
長

水決復入曰汜出去復還水草之交曰湄中有草木交會小水入大水曰淶淶水會山絕水曰壘壘謂山當水路令水勢斷絕

潛行曰泳水底行也正絕流曰亂直橫流也

水中可居者曰洲小洲曰渚小渚曰沚小沚曰坻

毛詩類釋卷四

欽定四庫全書

毛詩類釋卷五

國子監祭酒顧棟高撰

釋時令

唐風蟋蟀篇蟋蟀在堂歲聿其莫

毛傳曰蟋蟀九月在堂

張氏以寧曰周以十一月為歲首故此言九月以後  
為歲莫周正也

臣謹案日月其除除者除舊布新今人以臘月三十日為除夕是詩明言九月為歲將暮十月為歲除是以十一月為歲首之明證也

豳風七月篇一之日獻發至四之日舉趾

毛傳曰一之日周正月也二之日殷正月也三之日夏正月四之日夏二月周四月也

據此則公劉當夏之時已自以子月起數以夏之十一月為正月以夏之正月為三月矣一之日二

之日猶言一月之日二月之日不曰正而曰一者  
避時王之正朔也後武王伐商猶曰惟一月壬辰  
旁死魄蓋此時未革殷命猶從舊號實昉於此張  
氏以寧以豳風皆從夏時不引為周家建子之證  
蓋亦未悉此義

十月蟋蟀入我牀下至曰為改歲入此室處

孔疏曰為改歲者以仲冬十一月陽氣始萌可以為  
年之始故改正朔以建子為正歲亦莫止謂十月為

歲莫是過十月則改歲乃大寒故言改歲之後感發  
栗烈大寒之時方始入此室而居之也

臣謹案豳風凡言月者皆夏正言日者皆周正此  
於十月之下即云穹窒熏鼠曰為改歲是明言公  
劉當夏時已自以十一月為歲首不待注疏而本  
文已是顯然

九月築場圃十月納禾稼

至其始播百穀

孔疏曰上塞向墜戶是治都邑之屋此治野廬之屋

朱傳云所以于茅索綯治屋之急如此者蓋以來春將復始播百穀不暇為此也

臣謹案此書於十月之下則此時已是以十一月為來春矣可見三正原是通行夏時原不禁齏之用予正也

二之日鑿冰冲冲至獻羔祭韭

臣謹案二之日夏十二月也三之日夏正月四之日夏二月也以是為鑿冰藏冰啓冰之節月令仲

春之月天子獻羔開冰先薦寢廟是豳風以夏之  
二月為四月矣周之改正不待有天下時為然也

十月滌場

至萬壽無疆

朱傳云十月農功已畢歲晚務閒豳風相與盡其忠  
愛躋公堂稱兕觥而申來年萬壽之祝是亦十一月  
為歲首之一證也

小雅采薇篇采薇薇亦作止

至

曰歸曰歸歲亦陽

止



鄭箋曰十月為陽時純坤用事嫌于無陽故名此月為陽月

張氏以寧曰首章曰莫止而三章曰陽止則周十二月夏之十月也周以夏之十月為歲莫以十一月為歲首也

出車篇春日遲遲卉木萋萋倉庚喈喈采芣祁祁

張氏以寧曰諸詩皆屬周正無異詞獨此一篇有不合蓋周正雖改而夏正之迭用已久故民間之話言

猶不能忘而稱道之呂氏云見三正之通於民俗此  
皆述民俗之語言非史官之紀事也

杖杜篇日月陽止女心傷止征夫遑止

鄭箋曰十月為陽遑暇也陽月而婦人思望其夫者  
以初時云歲亦莫止

臣謹案此篇亦以十月為歲莫征夫可以歸而不  
歸故婦人思之也亦周正也

六月篇六月棲棲戎車既飭惟此六月既成我服

張氏以寧曰周六月夏四月也盛暑非猥狁入寇時也

此係張氏新說非毛傳舊說也然極有理六月盛暑北藩弓矢俱脫故歷代書防秋則此云夏之四月者較是

正月篇正月繁霜我心憂傷

毛傳正月夏之四月鄭箋云建巳純陽之月而霜多恒寒若之異傷害萬物故心為之憂傷

此正月夏之四月周之六月也

十月篇十月之交朔日辛卯日有食之亦孔之醜

鄭箋曰周之十月夏之八月也八月朔日日月交會而日食為陰侵陽臣侵君之象

張氏以寧曰下文燧燧震電蓋八月雷乃收聲之時而震電見焉亦為變異此詩亦周正也

四月篇四月維夏六月徂暑秋日淒淒百卉具腓冬日烈烈飄風發發

此篇毛鄭及孔疏皆主夏正說而張氏以寧必欲  
強從周月周時甚覺費力蓋周正只王者之發號  
施令與史官之編年紀事不得不用之至撫時道  
景則恒從夏正蓋此為切近便於人情而易曉如  
詩之咏春只云春日遲遲卉木萋萋不得以為周  
之春為夏十一月也此曰秋日淒淒百卉具腓若  
周之孟秋為夏之五月曰冬日烈烈飄風發發若  
周之孟冬為夏之八月豈有此景象乎張氏所云

民俗之話言時有雜出者於出車篇既言之何於此篇而必欲強從周正致為此牽強費力之說也

小明篇我征徂西至于芄野二月初吉載離寒暑二章昔

我徃矣日月方除曷云其還歲聿云莫三章昔我徃矣

日月方興曷云其還政事愈感歲聿云莫采蕭穫菽

張氏以寧曰周二月夏十二月也言自我之徂西至

于芄野之地其時十二月朔旦今則已離歷冬寒夏

暑尚未得歸此心之所以憂而且苦也曰至者據已

至彼地而言曰往者據在家始發而言二章三章乃  
追叙其始發之時也日月方除除者除舊布新之謂  
日月方與與厥民隤之義同周以十一月為歲首  
民寒而聚居於隤我之始往亦自謂其時即歸何至  
今歲將莫而尚未得歸至九月采蕭穫菽以為卒歲  
之用也蓋小明大夫以夏十一月始發徂西以十二  
月至于芄野至明年之九月尚未得歸經歷踰年之  
久所以憂也此詩首尾相應次序甚明與周正合若

以夏正二月而說則仲春非歲首不得以為除舊而布新自二月至九月則二月氣已暖至九月肅霜而肇寒亦不得以為離歷寒暑也

臣謹案張氏此章發明周正之旨十分精當若毛傳以方輿為二月之初訓輿為暖則二月尚未可云暖鄭又據爾雅文四月為除尤無當上甫言二月此忽言四月且自四月至九月皆暖日無寒時又何言載離寒暑乎孔疏於蟋蟀篇引此采蕭穫



菽為歲莫九月之事明以此為周正則此二月為  
周二月夏之十二月信矣

周頌臣工篇嗟嗟保介維莫之春至命我衆人庀乃錢  
鑄奄觀鉅艾

鄭箋曰周之莫春於夏為孟春諸侯春朝孟夏故于  
周之晚春遣之勅其車右保介以時事當歸勸農趨  
時也

孔疏曰知非夏之季春者以夏之季春非復朝王之

月故知此為夏之正月也夏之孟春耕期已逼故勅其車右以時事歸即耕田是也

張氏以寧曰蔡氏書傳引此以為麋麥將熟其為夏之莫春三月可知今考之全篇止曰將受厥明不曰來牟將熟將之云者未至而預期之辭見於經傳甚多況其曰如何新畲命我衆人庠乃錢鏹即七月之詩言于耜舉趾周官遂大夫正歲簡稼器修稼政之事嗟嗟保介即月令孟春祈穀天子載耒耜措之于

保介之御間皆夏正孟春事也若待建辰之三月始  
治新畬始庠錢鏐不亦晚乎將受厥明乃期之之辭  
非即詩賦之比不可以文害辭也則此莫春為夏之  
正月信矣

臣謹案張氏此條發明鄭孔周正之說亦極精朱  
子謂莫春是夏正建辰之三月恐未然

毛詩類釋卷五

欽定四庫全書

毛詩類釋卷六

國子監祭酒顧棟高撰

釋祭祀

宗廟 禴 祀 烝 嘗

大雅旱麓篇瑟彼玉瓚黃流在中

毛傳玉瓚圭瓚也諸侯九命然後錫以鉅鬯圭瓚

何氏楷曰黃流有二義毛謂黃金以飾流鬯瓚者盛

鬯之器用黃金為勺而有鼻口鬯酒從中流出器是黃金照酒亦黃故謂之黃流鄭但以黃流為秬鬯釀秬為酒以鬱金之草和之草名鬱金則黃如金色酒在器流動故謂為黃流鄭所以傳易者以言黃流在中當謂在瓚之中不謂流出之時且瓚既以朱為中央則其中亦朱而不黃矣据此則鄭說為長

大雅棫樸篇濟濟辟王左右奉璋

毛傳半圭曰璋

鄭箋璋璋瓚也祭祀之禮王裸以圭瓚諸臣助之亞裸以璋瓚

孔疏祭之用瓚惟裸為然天官小宰注云惟人道宗廟有裸天地大神至尊不裸

何氏楷曰周禮內宰職云后裸獻則瓚先儒說王行初裸后行亞裸其或后有不與則大宗伯攝之疏義云圭首銳一圭中分為二璋奉于王前則其中分處向王類人之鞠躬內向而歸心也

吳氏鼎曰小宗伯鄭注云天子圭瓚諸侯璋瓚王制  
孔疏又云若未賜圭瓚則用璋瓚此云左右奉璋當  
是文王為諸侯時之禮非指后裸亦非大宗伯攝行  
亞裸注疏家泛引亞裸立說殊欠分曉

大雅文王篇殷士膚敏裸將于京

孔疏宗廟之祭以灌為主周人尚臭舉裸將以表祭  
事見殷士來助祭耳不必專助行裸也

何氏楷曰祭必先灌乃後薦腥薦熟賈公彥云宗廟



之祭迎尸入戶坐於主北王以圭瓚酌鬱鬯以獻尸  
尸得之漑地祭訖啐之奠之不飲尸為神象灌地所  
以求神也

以上二灌

與祿同

為祭禮第一節王一獻后亞獻以

後為朝事延尸于戶西南面布主席東面

楊氏復曰司尊彝疏王以圭瓚酌雞彝鬱鬯始獻尸  
尸以灌地降神祭之啐之奠之此為灌神之一獻后  
以璋瓚酌鬱鬯亞裸內宰贊注云王既出迎牲后乃

從後灌也此為灌神之二獻

小雅楚茨篇絜爾牛羊以往烝嘗

臣謹案郊特牲既灌然後迎牲明堂位君肉袒迎牲於門卿大夫贊君祭統及迎牲君執鞞卿大夫從士執芻祭義祭之日君牽牲卿大夫序從既入廟門麗于碑卿大夫袒而毛牛尚耳祭器君親牽牲大夫贊幣而從按此係迎牲牽牲之事禮器納牲詔于廷地官充人碩牲則贊封人歌舞牲春秋

左氏傳奉牲告肥腍按此係告充之事以上儀節  
楚茨詩以絜爾牛羊四字該之

以上迎牲牽牲告充為朝事之始祭禮第二節

信南山篇執其鸞刀以啟其毛取其血膋

鄭箋毛以告純血以告殺膋以升臭取腸間脂合之  
黍稷實之于蕭乃以火燒之合馨香生民詩取蕭祭  
脂是也

孔疏先裸以降神乃以騂牡之牲迎而入于廟門以

獻于祖考所謂納亨也鄭注納牲將告殺謂向祭之  
晨既殺以授亨人

楚茨篇或剝或亨或肆或將

孔疏亨謂煮之使熟也肆謂陳于懸肉架周禮地官  
牛人所謂牛牲牙也將謂就牙上而齊之也二事俱  
在或亨之前以事相類故進或亨於上以配或剝耳

以上殺牲為朝事之事祭禮第三節

大雅生民篇取蕭祭脂

毛傳取蕭合黍稷臭陽達牆屋孔疏取蕭草與祭祀之脂熬之於行神之位合馨香

何氏楷曰蕭者蒿之香者也或云牛尾蒿白葉莖粗科生多者至數十莖可作燭有香氣甸師所供祭祀以脂熬之為香脂牛腸脂信南山所謂膋也疏云一祭之中再度炷蕭有朝踐之炷蕭有饋肉之炷蕭朝踐即朝事謂薦血腥時也饋肉一則薦黍稷時也二者俱見郊特牲及祭義古所謂香者如此祭祀用香

今古之禮並無其文

以上燔燎為朝事之禮祭禮第四節

楚茨篇祝祭于祊祀事孔明

毛傳祊門內也鄭箋孔甚明潔也孝子不知神之所  
在故使祝博求之門內待賓客之處祀禮於是甚明  
孔疏祊有二種繹祭之祊在廟門外之西正祭之祊  
當在門內

秦氏蕙田曰祊祭當在朝踐之節斯時事尸於堂薦

血薦腥薦爛無有飲食之事恐神之尚未憑依也故  
曰于彼乎于此乎至饋食則事尸於室以人道飲食  
之曰神嗜飲食曰神具醉止則尸實神所憑依而無  
恍惚求索之語矣何氏楷曰朝踐以前意在求神薦  
熟以後意在饗尸楚茨絜爾牛羊節是朝踐事執爨  
以下是饋食事而祝祭于祊在殺牲之下執爨之前  
此其證也

以上祊祭為朝踐之事祭禮第五節王三獻后四

獻

臣謹案周禮司尊彝其朝踐用兩獻尊鄭注獻讀為犧明堂位尊用犧象孔疏此犧尊周禮春夏之祭朝踐堂上薦血腥時用以盛醴齊君及夫人所酌以獻尸者也

楚茨篇執爨踏踏為俎孔碩

毛傳爨饗爨廩爨也孔疏饗爨以煮肉廩爨以炊米何氏楷曰此章專就薦熟言之以尸人也必薦熟而



後尸可享朝踐以前皆交於神明之道其意在於求  
神薦熟以後始兼用人道其事在於饗尸信南山啟  
毛取血此紀朝踐以前事二詩實相為首尾俎有所  
俎有折俎有尸俎有胾俎有主婦俎有祝俎有佐食  
俎有賓俎此言孔碩則尸俎也

以上薦熟為饋食之事祭禮第六節

楚茨篇莩芬孝祀

說文云莩馨香也芬草初生其香分布

卷二  
吳氏鼎曰此當指黍稷言書曰黍稷非馨明德惟馨  
信南山篇是蒸是享苾苾芬芬

何氏楷曰此時始薦黍稷饋食之薦不止于黍稷而  
獨言苾芬者祭以黍稷為主也

周頌載芟篇有飮其香有椒其馨

吳氏鼎曰祭以酒食為主而此詩又為農事既成而  
作故云然

以上薦黍稷為饋食之事祭禮第七節

楚茨篇或燔或炙

鄭箋燔燔肉也炙炙肝也皆從獻之俎特牲主人獻尸賓長以肝從主婦獻尸賓長以燔從

秦氏蕙田曰或燔或炙毛傳異義毛以為燔取胙骨鄭以為從獻之俎据取胙骨在殺牲時則當言之或肆或將之下而不應言之執爨踏踏之下此執爨踏踏已是薦熟時非朝踐時矣故朱子從鄭不從毛

楊氏復曰儀禮大夫士之祭禮不裸不薦血腥唯于

室中設尸主行饋食禮天子諸侯饋食以前堂上設  
南面位行裸鬯薦腥之禮而後延尸入室東面位行  
饋食后薦饋獻之豆籩王以玉爵酌盞齊以獻尸此  
五獻后又以玉爵酌盞齊以獻尸此六獻也

以上從獻為饋食之禮祭禮第八節王五獻后六  
獻

楚茨篇工祝致告祖賚孝孫

毛傳善其事曰工何氏楷曰楚茨孝祀以下皆祝所

傳嘏辭

天保篇君曰卜爾萬壽無疆

鄭箋君曰卜爾者尸嘏主人傳神祠也

大雅既醉篇公尸嘉告

朱子詩傳公尸君尸也周稱王而尸但曰公尸蓋因其舊如秦已稱皇帝而其男女猶稱公子公主也嘉告以善言告之為嘏辭也

以上尸嘏為酌尸之事祭禮第九節王七獻后八

獻諸臣九獻

小雅賓之初筵其耽曰樂各奏爾能

鄭箋各奏爾能者謂子孫于既耽之後各酌獻尸尸  
酢而卒爵也士祭禮上嗣舉奠因而酌尸天子則有  
子孫獻尸之禮

孔疏以天子祭禮亡約士之祭禮有嗣子舉奠因酌  
尸因知天子則有子孫獻尸之禮

賓筵篇賓載手仇室人入又

鄭箋仇讀曰斟室人謂佐食又復也賓手挹酒室人復酌為加爵仇挹于壘酌注于爵也

楊氏復曰九獻之後謂之加爵特牲禮長兄弟衆賓長及佐食有三加爵則天子諸侯亦當然也按子孫獻尸之後賓長佐食復酌為加爵

以上九獻之後加爵祭禮第十節

楚茨篇為賓為客獻酬交錯

鄭箋主人酌賓為獻賓酢主人主人復自飲而復飲

賓曰酬至旅酬交錯以徧

賓筵篇酌彼康爵以奏爾時

鄭箋康虛也時謂心所尊者

孔疏加爵之時賓與兄弟交錯以酬爵未虛也至卒

爵實解于筐此後爵乃虛矣賓弟子兄弟之子各舉

解于其長是奏所尊之事也 此即中庸旅酬下為

上一節

以上旅酬祭禮第十一節



楚茨篇孝孫徂位工祝致告

鄭箋祭禮畢孝孫往堂下西面之位祝於是致孝孫之意告尸以利成

秦氏蕙田曰告利成鄭以為告尸朱子以為告主人當以朱子為是孔疏大夫士告主人天子告尸恐未必然

楚茨篇神具醉止皇尸載起鼓鐘送尸神保聿歸

鄭箋具皆也皇君也尸出入奏肆夏

何氏楷曰鼓鐘之鼓從支與鐘鼓之鼓從支不同彼二器並作此鼎以擊鐘為主所謂金奏也

以上告利成送尸祭禮第十二節

楚茨篇諸宰君婦廢徹不遲

鄭箋諸宰徹去諸饌君婦籩豆而已

孔疏周禮九嬪凡祭祀贊后薦徹豆籩膳夫徹王之胾俎注云胾俎最尊其餘則其屬徹之

以上徹祭禮第十三節

楚茨篇諸父兄弟備言燕私

鄭箋祭祀畢歸賓客豆俎同姓則留與之燕以盡私  
思所以尊賓客親骨肉也

楚茨篇樂具入奏以綏後祿

至末

孔疏祭時在廟燕當在寢故言祭時之樂皆復入于  
寢奏之以安其後日之福祿也神嗜飲食以下皆小  
大之慶詞案此即中庸燕毛一節

以上燕同姓為祭禮第十四節

臣謹案祭禮繁重特牲少牢須盡日始能成禮天子九獻更當何如祫祭酒可若植祭將使人攝歟或另擇日歟吳氏鼎曰祭必同日經但言祫祭之禮耳特祭曰禴程子謂禴是禮之薄者易曰東鄰殺牛不如西鄰之禴祭儀文當從簡省不盡如詩禮所云也然此說不見于經文學者但當從程子之說

長樂陳氏曰時祭有小禮有大禮小禮春也大禮夏

秋冬也禮記曰大嘗周禮曰大烝則知春祀之為小禮矣鄭云春以物無成不殷祭殷盛也是指祭當從畧延平周氏謂祔以飲為主祫以食為主既以飲為主則宜有獻酬交錯之禮矣祭一廟已盡醉如何更祭別廟乎

張子曰天子必親行祭事時祭則逐廟行禮勢必十數日而後能徧仍不得各為齋戒或以是容有司行事乃可以同日而事畢又曰天子七廟一日而行則

力不給故禮有一牴一祫之說如春祭高祖夏祫羣  
廟秋祭曾冬又祫來春祭祖夏又祫秋祭禰冬又祫  
程子曰為廟禮繁故每年於四祭之中三祭合食于  
祖廟惟春則各祭諸廟孔疏禘薄也春物未成其祭  
品鮮薄

楊氏復曰如張子所云雖於一牴一祫之說若可通  
但言牴只祭一廟而遺其餘廟恐於人情亦有所不  
安不若程子之言簡而備也

臣謹案所疑者程張二子亦疑之張子有二說意  
有司行事之說為妥尚書洛誥王賓殺禋咸格孔  
安國傳曰王以命周公重大其事故文武皆至其  
廟親告之可見平日之祭不皆至也此當使重臣  
攝祭故周公祭泰山召公為尸為尸猶可況攝祭  
乎若必親臨其事勢必不能逐廟齊戒以精力倦  
怠之餘竭蹶勉強不敬滋甚若如張子高曾祖禰  
更迭攝祭之說則天子七廟又有文武二世室親

廟當至五年而一周不嫌于太疏曠乎

又謹案楚茨一詩天子宗廟祭禮首尾節次具備  
但未及二灌之禮耳故前列旱麓棫樸二詩以補  
之旱麓之玉瓚即圭瓚王以初灌棫樸之奉璋即  
璋瓚后用以亞灌后不與則大宗伯攝之應在楚  
茨或剝或亨之前信南山之啟毛取血即或剝或  
亨時事也燕同姓以後為明日之繹祭則絲衣與  
鳧鷖二詩盡之矣



爾雅商曰彤周曰繹郭璞註祭之明日尋繹復祭孔  
疏天子諸侯謂之繹在祭之明日於廟門外西室及  
堂而行禮也上大夫曰儻尸與祭同日于廟堂之上  
行禮也儀禮有司徹正是上大夫儻尸之禮但于堂  
上獻尸獻侑全無室中之事是與天子禮異  
絲衣篇絲衣其紃載弁球球自堂徂基自羊徂牛

孔疏弁爵弁也士爵弁而助祭于王繹禮輕使士升  
堂視壺濯降往于基告濯具又視牲從羊之牛反告

充已乃舉鼎罍告潔禮之次也

臣謹案繹禮事神禮畧饗尸禮重故首二句絲衣爵弁但舉士之祭服絕不言事神之事下文告濯具告充告備則尚為饗尸而設蓋大夫士饗尸與正祭同日牲酒不煩另具天子之繹在祭之明日故須有此等事至設兕觥爵爵先儒謂大夫士祭禮猶不用此蓋正祭日嚴肅雖獻酬無算爵而助祭之人心存誠敬無容更設糾繩至繹祭以享生

人為主懼有失儀故須設兕觥鳧繹詩所謂公尸燕飲即歌其事也

鳧鷖篇公尸來燕來寧

至末

朱子語錄古者祭必有尸既祭之明日則煖其飲食以燕為尸之人故有此詩

臣謹案絲衣詩云自堂徂基自羊徂牛是祭之明日另殺牲以享尸非煖其飲食之謂也周禮牛人職云祭祀共其享牛求牛鄭注享牛用以祭求牛

用以繹繹者孝子求神非一處故以繹牛為求牛也此則繹禮別殺牲之明證

徐常吉曰按楚茨鼓鐘送尸神保聿歸則祭畢之燕尸不與也尸何以不與以其象神故不敢留而轉為次日之燕也燕于次日所以尊尸也尊尸所以尊神也

何氏楷曰是日先行繹祭之禮而後享尸此云公尸來燕則是祭後燕尸非祭時也陳氏禮書曰正祭重

而主于禮神繹祭輕而主于禮尸故繹于明日則異  
牲若賓尸于祭日則用正祭之牲而已

以上繹賓尸祭禮第十五節

臣謹案天子宗廟祭禮于詩首尾節次備具可與  
儀禮特牲少牢相發然此皆謂祫祭耳祭禮以祫  
為重蒸嘗皆祫也故楚茨曰以往烝嘗商頌曰顧  
予烝嘗春秋但記烝嘗而無禴祀神具醉止具皆  
也非止一神后稷東面先儒謂神尊為發爵之主

不與子孫為酬酢其獻酢交錯皆主六尸而言若特祭禮自當從省簡但文不傳耳

禘祫

周頌雝序曰禘太祖也

鄭箋太祖謂文王

孔疏禘祫皆殷祭武王以周十二月崩其明年周公攝政稱元年十二月小祥二年十二月大祥三年二月禫四年春禘盖在此時

臣謹案此詩文不特朱子據趙氏匡說之為非即孔疏謂武王崩而禘祭亦誤竊謂此文王崩三年喪畢之吉禘也春秋家說三年喪畢致新死者之主于廟諦審昭穆亦謂之禘此詩當在此時何則從來祭禮無及于女者此詩曰既右烈考亦右文母無及太姒案士虞禮記云男男尸女女尸又云是月也吉祭猶未配蓋既配則合女于男故太廟中七廟惟及男不及女儀禮特牲少牢無有女尸

與主人主婦酬酢者此其證也吉禮猶未配蓋此時尚祭文王與太姒既諦審昭穆而祔於太廟則文母不復祭矣不然七廟中男女皆有尸雜沓一室內豈復成禮乎曰武王此時未克殷何得云相維辟公天子穆穆曰此周公致太平作禮樂時追稱之也凡雅頌皆是周公所作武王未遑制禮樂安得有頌

商頌長發序曰大禘也



臣謹案趙氏匡說謂禘唯祭始祖與始祖所自出  
不兼羣廟之主如此則商之禘宜但祭嚳與契耳  
而此時無一字及嚳徧稱相土成湯併及阿衡足  
明此說之非矣朱子因謂宜為祫祭之詩蓋朱子  
酷信趙說故為此語耳

陳氏禮書曰陸淳謂禘祭不兼羣廟為其疎遠不敢  
褻祭此殆未嘗考之于經也看此詩言玄王相土則  
不兼羣廟之說不足信矣

何氏楷曰漢儒皆以大禘為合祭程子及胡致堂皆

從之而趙楊

謂趙氏匡及宋楊氏復也

泥于大傳中之一語謂禘

惟祭始祖與所自出二人今据大傳本文曰禮不王

不禘王者禘其祖之所自出以其祖配之諸侯及其

太祖大夫士有大事省于其君于祫及其高祖馬端

臨謂玩其文意亦似禘祫共只說一祭盖共是合祭

祖宗天子則謂之禘諸侯及大夫士則謂之祫以君

臣之故所及有遠近也張純謂禘是諦審昭穆則七

廟之主咸在亦以明矣

商頌玄鳥序曰祀高宗也

鄭箋祀當為裕裕合也

孔疏經遠本玄鳥生契帝命武湯言高宗能興其功業因裕祭而美其事故序言裕以總之

康熙庚午監察御史李時謙疏請舉行禘禮事下九卿詹事科道會議禮部尚書張玉書等議曰臣等綜考禮制言禘者不一有謂虞夏禘黃帝殷周禘帝嚳

皆配祭昊天於圜丘者有謂祖之所自出為感生帝而祭之於南郊者有謂圜丘方澤宗廟為三禘者先儒皆辨其非而言宗廟之禘又不一說有謂禘祭止及毀廟不及親廟者有長發之詩為商之禘而親廟與毀廟皆兼祭者惟唐趙匡陸淳皆以為禘異于祫不兼羣廟王者既立始祖之廟直推始祖所自出之帝而以始祖配之故名為禘至于三年一祫五年一禘經無明文其說始于漢儒而後之議禮者咸宗之

漢唐宋所行禘禮亦莫考始祖之所自出止于五歲之中行一祫一禘兩大祭于其宗廟而已大抵夏商以前有禘之祭而其制未詳漢唐之後有禘之名而與祫無別惟周以后稷為始祖以帝嚳為所自出之帝而太廟之中原無帝嚳之位故祫祭不及帝嚳至禘祭時乃特設帝嚳之位以稷配焉行于後代不能盡合故宋神宗諭廷臣議罷禘禮明洪武初御史答祿與權請舉禘祭衆議亦以為不必行詔從其議至

嘉靖中乃立虛位祀皇初祖帝而以太祖配享事屬  
不經禮亦旋罷洪惟我

國家受天顯命世德相承定鼎之初追上四祖尊稱以  
肇祖原皇帝始基王迹故首立廟祀夫太廟之中以受  
命之君為太祖允宜特尊者也我

太祖高皇帝功德隆盛與天無極自當為太廟萬世之  
祖上而推其所自出則締造之業

太祖為最著今

太廟祭祀四孟分祭於前殿後殿以各伸其尊歲暮祫  
享于前殿以同將其敬一歲之中自

肇祖以下屢伸裸獻仁孝誠敬已無不極五年一禘之

祭不必舉行

王士禎  
居易錄

以上宗廟

郊祭禮

周頌昊天有成命序曰郊祀天地也

朱氏鶴齡曰宋元祐間蘇氏軾據此為合祀天地之

明證而其實不然此詩乃成王即政郊見上帝之樂歌言天而并及地猶言父而并及母禮記兆于南郊就陽位也器用陶匏象天地之性也亦兼地言之周人本無合祀之禮安得有合祀之詩乎

思文序曰思文后稷配天也

朱子語錄問郊祀后稷以配天宗祀文王於明堂以配上帝天帝只一却分祭何也為壇而祭故謂之天祭于屋下而以神示祭之故謂之帝



程子曰以冬至物生之始故祭于圜丘而配以祖陶  
匏藁秣掃地而祭以季秋物成之時故祭于明堂而  
配以父以宗廟之禮享之

附北郊論

宋自元祐諸臣爭南北郊合祀分祀後紹聖中蔡  
京用事詆誣宣仁謂踵王莽諂事元后故事詔罷  
合祭然北郊親祠終帝世未有能舉行者臣向主  
明儒王樵說謂古者郊社對舉祭天曰郊祭地曰

社安得南郊之外復有北郊郊以祭天言天而地  
已舉此陰統于陽卑統于尊之義地只祭社而已  
又安得天地合祀于南郊紫樵之說即宋儒胡氏  
宏之說朱子据之以釋中庸郊社之禮者也可見  
朱子後來亦不信北郊語詳訂詁中今再考元明  
兩代元世祖時中書禮部移太常擬定北郊禮儀  
博士等請法坤數用六之義去都城北六里為方  
壇三成六陛仍自外壇之外四面稍令低下以應

古者澤中之制其時卒不果行至仁宗延祐元年  
太常請立北郊帝謙遜未遑北郊之議遂寢明祖  
初即位建方丘壇于鍾山之陰以夏至祭皇地祇  
亦未云北郊也十年感陰雨始行合祀成祖遷都  
亦因舊制至世宗九年從夏言議始兆方丘于北  
郊隆慶三年張居正請仍行合祀是北郊自歷代  
以來行之徒成具文不行亦非闕典紛紛聚訟非  
俗士之拘牽即奸臣之迎合必求其說則如胡宏

之與王樵言古者只有郊社更無北郊稽之經典  
確有明據為斷不可易也

朱子曰本朝初分南北郊後復合而為一周禮亦只

說祀昊天上帝不說祀后土故先儒言無北郊祭社

即是祭地

此胡氏  
宏之說

古者天地未必合祭日月山川百

神亦無一時合祭共享之禮古之時禮數簡而儀從  
省必是天子躬親行事豈有祭天却將上下百神重  
沓累積併作一祭耶且郊壇陞級兩邊上下皆是神

位中間恐不可行

宋史郊祀志

馬氏端臨曰北郊之名本出緯書

孝經緯祭地祇于北郊

禮經

所不載鄭氏因祭法有泰折之語而以為泰折即北

郊非方澤支離甚矣

文獻通考

臣謹案鄭氏分園丘方澤與南北郊為二致有宋

夏日至祭皇地祇以太祖配孟冬別為壇于北郊

祭神州地祇以太宗配夫地祇豈有二哉至夏言

增立東郊西郊以朝日夕月不經彌甚

明堂祭禮

周頌我將序曰祀文王于明堂也

詩緝陳氏曰古者祭天于圜丘掃地而行事器用陶  
匏牲用犢其禮極簡聖人以為未足以報本故於季  
秋之月有大饗之禮焉然則郊者古禮而明堂周制  
也周公以義起之也

陳氏禮書曰明堂禮北郊為文比廟為質郊祭掃地  
藁秸而已明堂則有堂有筵郊祭則特牲而已明堂

則維羊維牛郊祭有燔燎而明堂則有升禋由漢及

唐或祀太乙五帝

光武

或特祀五帝

光武

明帝

或除五帝之

座同稱昊天上帝

晉武

或合祭天地

唐武

中宗

后

或配以

祖或配以羣祖又明堂之制變易不常與考工之說不同皆一時之制然也

楊氏復曰月令有大享之文我將有維羊維牛之語則明堂之禮比郊尤備程子曰其禮必以宗廟之禮享之朱子亦曰祭于屋下而以神示祭之蓋謂此也

或問朱子曰我將之詩乃祀文王于明堂之樂章詩傳以為物成形于帝人成形于父故季秋祀帝于明堂而以父配之取其成物之時也此乃周公以義起之非古制不知周公以後將以文王配耶抑以時王之父配耶曰諸儒正持此論至今不決看來只得以文王配且周公所制之禮不知在武王時在成王時若在成王之時則文王乃其祖也亦可見配天不啻于嚴父矣又問繼周者如何曰只得以前有功之祖配



之後來妄將嚴父之說亂了

宋英宗治平元年大饗明堂議以仁宗配侑司馬光等奏曰孝子之心誰不欲尊其父者聖人制禮以為之極不敢踰也考尋前世前漢以高祖配天後漢以光武配明堂以是觀古之帝王自非建邦啟土及造有區夏者皆無配天之文孔子以周公有聖人之德制禮作樂而文王適其父故孝經曰嚴父莫大于配天以答曾子之問非謂凡有天下者皆當如此然後

孝也近世祀明堂者皆以其父配五帝此乃誤識夫  
孝經之意不可以為法令議者欲以仁宗配明堂恐  
於祭法不合不獨乖違典禮恐亦非仁宗意識上詔  
竟從孫抃等議以仁宗配享明堂

案光所奏與錢公輔等合公輔奏曰孝經所稱嚴  
父配天則周公其人也以周公言之則嚴父以成  
王言之則嚴祖也後世失禮不足考據請一以周  
事言之太宗則周之文王真宗則周之武王真宗

雖有配天之功而無配天之祭未聞成王以嚴父之故廢文王配天之祭而移于武王也仁宗則周之成王亦未聞康王以嚴父之故廢文王配天之祭而移于成王也下至兩漢去古甚遠而明堂配祭東漢為得孝明始建明堂以光武配其時適符嚴父之說及時異事殊而章安二帝亦弗之變此最為近古而合于禮者有唐不明斯義在孝和時則以高宗配在明皇時則以睿宗配在永泰時則

以肅宗配禮官杜鴻漸王涯輩不能推明經訓務合古初反雷同其論以惑世主延及于今牢不可破當仁宗之初倘有建是論者則配天之祭當在乎太宗矣當時無一言者故使宗周之典禮不明于聖代伏望陛下深詔有司博謀羣議使配天之祭不膠于嚴父而嚴父之道不專于配天循周家之典禮替有唐之曲學幸甚上又詔兩制官再詳定尋以孫抃等奏議而寢嗣後英宗神宗晏駕俱

用扞議配侑廟至南渡紹興七年議陞徽宗配享  
是時梓宮未還尤為可笑

先是紹興初禮部尚書胡直孺奏曰仁宗皇祐時  
大享明堂合祭天地並侑祖宗徧祀百神聖訓有  
禮緣人情之語由此觀之皇祐祀典本非為萬世  
不易之經也國朝配祀初無定制自英宗始專配  
以近考司馬光呂誨爭之不能得神宗皇帝意欲  
釐正而王安石又誤引孝經嚴父之文不能將順

上意謹案太祖則周之后稷宜配祭于郊者也太宗則周之文王宜配祭于明堂者也皇祐崇祀固宜以太祖太宗配當時蓋泥于嚴父故配帝併及于真宗今主上紹膺大統則真宗至神宗均為祖廟獨躋則患在于無名並配則幾同于祫享又從祀百神本非典禮或升或黜慢瀆為多乞自今明堂專奉太祖太宗配禮專而事簡庶不失周公制禮初意議上不果行逮徽宗升遐議配侑禮官請

俟恢復後再議至三十一年竟配享明堂嗣是嚴父之說終南宋世莫之改

臣謹案我將為宗祀明堂之樂歌卒章云畏天之威于時保之徽宗以失國之君而配享于義何取乎祀典之濫于斯極矣

附明堂論

臣謹案明堂禮自孝經有嚴父配天之一語致後來儒者紛紛聚訟歷代典禮亦不畫一或每代易

配或三聖並配觀司馬公及錢公輔之奏朱子之  
論可以曉然大白矣至其制度經無明文大戴禮  
則云九室考工記又云五室漢武時公玉帶所上  
黃帝明堂圖一殿無壁茅蓋通水雖不經見猶不  
失古者簡朴之意降及北魏周齊議營規制諸儒  
爭論迄無一就終隋之世大饗之禮率寓雩壇唐  
則寓于園丘而已惟武后毀東都乾元殿為之崇  
極奢麗肆其侈心後亦旋毀至宋仁宗皇祐二年



始詔以大慶殿為明堂三聖並侑有宋一代明堂  
自皇祐始理宗舉行皇祐故事以太祖太宗寧考  
並配實祐五年復詔增高宗蓋至是而配天者凡  
四矣明世宗用諂臣豐坊之請尊皇考睿宗配祀  
以藩臣而干大典僭莫甚焉原其故皆由嚴父之  
一言啟之也

本朝稽古右文深明典禮破拘牽之陳說昭一代之  
彝憲會典所載郊祀止用園丘方澤而斥去北郊

及神州百神諸祠太廟止用四孟時享及歲除祫祭而明堂與禘禮槩不舉行非聰明聖知其孰能與于此哉

又案孟子謂明堂王者之堂此又王者巡狩之地有明堂以朝諸侯行政與在國之明堂有別

周頌噫嘻序曰春夏祈穀于上帝也

孔疏周公成王之時春郊夏雩以祈穀實詩人述其事以作歌

李氏樗曰月令孟春元日祈穀于上帝仲夏之月大雩帝用盛樂祈穀實春則因民播種以啟蟄之時而郊夏則恐旱暵為災于龍見之時而雩皆所以祈穀于上帝也

又曰是詩初無祈穀之意但以為人事于此盡矣故播厥百穀十千維耦此皆人之所能為也若夫雨暘時若使百穀順成此非人之所能為則天也故于此而祈穀焉

詩緝曰祈穀之後即躬耕帝籍故言率時農夫以張本也言駿發爾私不及公田為民祈也

何氏楷曰魯無冬至大郊之禮降殺于天子春秋所書卜郊皆孟春祈穀之郊也然穀梁所稱與明堂位左傳異穀梁曰我以十二月下辛卜正月上辛如不從則卜二月上辛如不從則卜三月上辛如不從則不郊矣明堂位曰孟春乘大路祀帝于郊左傳亦曰啟蟄而郊知魯郊只在夏正建寅之一月則啖助之

說為得之啖助曰以周二月卜三月上辛不吉則卜  
中辛又不吉則卜下辛三辛推移總不出建寅一月  
之內若三卜不從則孟獻子所云既耕之後亦可無  
用郊為矣建寅之郊用卜而冬至之郊不用卜家語  
云周之始郊其月以日至其日用上辛定用上辛之  
一日此不用卜也月令曰孟春之月天子乃以元日  
祈穀于上帝乃擇元辰辰必須擇此以知祈穀之郊  
用卜也然仍以辛日為主鄭康成謂取人君齋戒自

新之意章首有成王昭格之語知此詩作于康王之  
世乃主作龜禰宮而言不然周以農事開國即欲勸  
農官何不于始祖后稷之廟而顧于成王何取乎案  
何氏之說最明確

臣謹案毛謂成王為成是王業之王王既已政教  
光明如此猶能敬重農事云云蘇氏轍亦謂歎天  
之所以成我王業者既昭至矣皆以成王為非謚  
法而別創一解其誤皆以頌為周公所作無康王

以後之詩故于昊天有成命曰二后受之成王不  
敢康為文武成此王業不能康寧于執競曰不顯  
成康上帝是皇為武王持其自强不息之心所以  
能成大功而安之朱子初亦從毛解後定集傳始  
從歐陽說而闢毛鄭則歐陽與集傳其為當從無  
疑也朱子曰昊天有成命明是康王時詩執競明  
是昭王以後之詩而今硬要解做成王業成此大  
功而安之費盡氣力不知怎生地其言可謂深切

著明矣而李氏樗郝氏敬猶欲開集傳而從毛鄭  
舍簡直而就支離臣不知其何心也

景纂曰古序所傳是頌中一大禮所在朱子初亦信  
之後改為亦戒農官之詩未審何据且以為國中鄉  
遂之地用貢法無公田故皆謂之私夫天子戒勅當  
及天下乃止及國中之鄉遂猶未及乎畿甸似不如  
毛說為長

雩祭



大雅雲漢篇靡神不舉靡愛斯牲

臣謹案孟夏大雩雖無水旱亦行之禮之常也若國大旱則無論夏秋皆得雩此詩所陳是也然曰不殄禋祀自郊徂宮上下奠瘞靡神不宗又不止雩上帝而已周禮荒政曰索鬼神謂搜索鬼神而祭之此其事也

補傳曰二章于羣祀之中訴於神之尊者如后稷如上帝四章又于羣祀之中舉其神之親者而告之如

雩祀之羣公先正宗廟之百辟卿士是也案是詩靡神不宗而言上帝凡四無言五帝乃知五帝出于秦漢妄也而周禮言祀五帝故世儒多疑其偽

孔疏神異經曰南方有人長二三尺袒身而目在頂上走行如風名曰魃所見之國大旱一名旱母蓋是鬼魅之物

晉穆帝永和時博士議曰雲漢之詩宣王承厲王撥亂遇災而懼故作是歌今晉中興奕葉重光豈比周

人耗數之辭乎漢魏俱別造新書晉室太平不必因  
故司徒蔡謨議曰雲漢之詩興于宣王今歌之者取  
其修德禳災以和陰陽之義故因而用之無庸更作  
梁武帝天監十年朱異議曰雲漢詩中毛傳有瘞埋  
之文不見燎柴之說帝亦以用火祈水于理為乖于  
是停用柴燎從坎瘞典十二年大雩國南除地為壇  
舞僮六十四人皆衣元衣為八列皆執羽翳每列歌  
雲漢詩一章而舞

靈星祭

周頌絲衣序高子曰靈星之尸也

漢書郊祀志高祖五年或言周興而邑立后稷之祠至今血食天下于是制詔御史其令天下立靈星祠祀后稷謂之靈星者者以后稷配食是也張晏曰龍星左角曰天田則農祥也晨見而祭之孝武遊登五岳尊祀靈星世祖建武二年立靈星祠有司掌之晉令縣祀靈星唐以立秋後辰日祀靈星開元祀于國

城東南天寶四載升中祠宋皇祐中立靈星壇東西丈二尺南北亦如之歷代靈星之見于祀典者如此祠之設專為祈田每隸郡邑惟周之肇祀反其所自始與后稷比隆

臣謹案后稷已祭于周太廟此復郡邑立祠此漢世原廟所由起也周禮戴記俱不經見惟晉語有后稷是相之一語想漢初人因此而生為妄說耳郡縣已有社稷壇更何煩靈星以祀后稷乎

何氏楷曰絲衣詩有二說一曰繹賓尸一曰靈星究以高子之說為是陳祥道亦主其說按靈星為農祥東方蒼龍七宿房心通有農祥之稱周語農祥晨正土乃脉發韋昭以為房心也于立春之日農事之候祭之故曰農祥晉語董因曰大火闕伯之所在也是為大辰后稷是相韋昭謂心星所在大辰辰次為天駟駟馬也辰為農祥合前二說則房心俱有此號亦以二星相近故也而賈陸應劭張晏蔚蔚宗則俱謂

龍星左角曰天田為農祥考之星經則天田二星在  
角北故服虔直以靈星為角星唐志又以靈星為歲  
星其祭之日或云立春或云仲秋或云歲再祭紛紛  
不一今以此詩證之則正孟冬蜡祭時事其謂祭于  
仲秋與春秋再祭者皆誤也蜡祭之禮皮弁素服與  
他祭不同据此詩曰絲衣曰載弁與禮文正合則靈  
星為蜡祭無疑

社祭

大雅繇篇廼立冢土

毛傳冢土大社也起大事動大衆必先有事乎社而後出謂之宜詩美太王之社遂為大社

輔氏曰社自天子至庶人皆得祭之然非尊者所立則亦不可

何氏楷曰大社之名惟施于天子諸侯僅可言冢土詩言廼立冢土正是太王當日為諸侯之法泰誓言宜于冢土則猶仍太王舊稱以未為天子故也



小雅甫田篇以社以方大雅雲漢篇方社不莫

說見方祭

祈祭

周頌載芟序曰春藉田而祈社稷也

孔疏成王周公太平之時王者于春時親耕藉田以  
勸農又祈求社稷使民獲其年豐歲稔詩人述其事  
而作此歌

報祭

良耜序曰秋報社稷也

孔疏周公成王太平之時年穀豐稔以為由社稷之所致故於秋物既成王者乃祭社稷之神以報

豐年序曰秋冬報也

朱子詩傳此報賽田事之樂歌蓋祀田祖先農及方社之屬按陳氏禮書謂秋報者季秋之于明堂冬報者冬至之于郊非是

田祖祭

小雅甫田篇琴瑟擊鼓以御田祖以祈甘雨

毛傳田祖先嗇也孔疏郊特牲及春官籥章注俱謂先嗇為神農始教造田謂之田祖先為稼穡謂之先嗇神其農業謂之神農名殊而實同也

何氏楷曰孔疏以田祖即神農朱子亦從之今按以神農為田祖經傳無明文王安石謂生為田正死為田祖猶樂官之死而為樂祖也以樂祖例田祖于理近之

臣謹案神農為五帝天子所祭民間安得琴瑟擊鼓  
鼓以御田祖乎安石之說為是

高禩祭

大雅生民篇克禋克祀以弗無子

商頌玄鳥篇天命玄鳥降而生商

秦氏蕙田曰二詩推本稷契之生由于祈祀高禩而  
得其日以玄鳥至之日故云天命玄鳥降而生商說  
者以為稷母履大人跡而有身契母吞鵲卵而有身

非也

臣謹案歐陽修主是說但祈高禩而有身是平常事極可慶幸何故以為不祥而置諸隘巷與寒冰乎朱子及呂氏祖謙俱從康成說與此異

行祭

國風泉水篇飲餞于禰

毛傳祖而舍輶飲酒于其側曰餞禰地名

臣謹案聘禮出祖釋輶祭酒脯乃飲酒于其側祖

始也是為行道之祭

孔疏周禮大馭掌馭玉輅及犯輶遂驅之注云封土為山象以菩芻棘栢為神主既祭之以車轆其上而去喻無險難也以此行道之祭故知在國門之外大雅生民篇取羝以輶載燔載烈

毛傳羝羊牡羊也輶道祭也傳火曰燔貫之加之火曰烈

孔疏又取羝羊以為祀輶之祭其祭輶也又取所祭

之肉或傳火而燔之或加火而烈之以為尸之羞以  
七祀皆有尸知此輟祭亦有尸后稷是時為諸侯若  
聘禮卿大夫輟祭用酒脯則無尸矣

山川告祭

周頌時邁序曰巡狩告祭柴望也詩云懷柔百神及河  
喬嶽

孔疏武王既定天下巡行其守土諸侯至于方嶽之  
下作告至之祭柴祭昊天望祭山川安祀百神

般序曰巡守而祀四嶽河瀆也詩云陟其高山墮山喬嶽允猶翕河

毛傳高山四岳也墮山之狹小者翕合也

四方報祭

小雅甫田篇以我齊明與我犧羊以社以方

鄭箋曰以我潔齊豐盛與我純色之羊秋祭社與四方為五穀成熟報其功也

孔疏大司馬仲秋獮田羅罃致禽以祀祊祊即方聲



之悞也。獮田主祭四方報成萬物。即引此詩云：以社以方。是報祭四方在仲秋也。

大雅雲：漢篇祈年孔夙。方社不莫。

孔疏：祭社與四方。即以社以方是也。

小雅大田之篇：來方禋祀。以其騂黑。與其黍稷。以享以祀。

鄭箋：成王之來。則又禋祀四方之神。祈報焉。孔疏云：祈報並言者。言其報秋成而祈後年也。方宜五色獨

舉騂黑者畧舉二方以韻句耳

附錄

陳氏稽古編曰鄭康成王肅論郊祀各不同鄭謂  
天有六天歲有九祭王謂天惟一天歲止二祭六  
天者天皇上帝及五帝精也九祭者冬至圜丘祭  
天皇上帝配以帝嚳為一祭大司樂地上之圜丘  
大宗伯禋祀昊天上帝祭法帝嚳是也夏正月祈  
穀于南郊祭感生帝配以后稷又為一祭郊特牲

迎長日之至春秋書郊左傳啟蟄而郊祭法郊稷  
是也夏祈穀于南郊徧祀五精帝配以五人帝又  
為一祭春秋經及月令大雩左傳龍見而雩是也  
四時及季夏迎氣祭五精帝亦配以五人帝又共  
為五祭小宗伯兆五帝于四郊月令迎氣于四方  
是也季秋大饗明堂祭五精帝配以五人帝及文  
武又為一祭文配曰祖武配曰宗月令大饗帝孝  
經宗祀文王于明堂以配上帝祭法祖文王而宗

武王是也合之凡九矣王則謂圜丘即交日至與  
孟春止祭一天其迎氣與明堂皆祭人帝非天也  
後儒各宗其師說故歷代郊祀之制互有變易宋  
儒主王惟明堂之祭仍以為上帝云以鄭學言之  
其樂章則圜丘歌昊天有成命明堂歌我將春祈  
穀夏大雩皆歌噫嘻而商頌長發大禘亦圜丘所  
歌也至迎氣之樂章則周頌無文焉又玄鳥至之  
日郊禘祈祭亦祭感生帝而配以先禘生民克禋

克祀是也此在九祭之外

臣謹案陳氏列鄭王之說極精細但以日至之郊與祈穀為一似誤迎長日之至即冬至圜丘祈穀在孟春夏正月為時二春秋所書但指祈穀之郊魯無日至之郊殺于天子此混而一之未是

社稷歲凡三祭其二祭見詩載芟祈社稷此春祭也月令仲春命民社指此甫田之以社以方良耜秋報社稷此秋祭也又一祭在孟冬月令大割祀

于公社是也詩未及焉案王鄭論社稷亦多異議  
謂社祭句龍稷祭后稷是人鬼非地神者此王肅  
祖孔安國賈逵馬融之說也謂社是五土總神而  
句龍配之稷為隰原之神而后稷配之此鄭康成  
之說而其徒馬昭等述之者也肅與昭等往復辨  
難不啻聚訟後儒莫能定其是非焉

七廟之說王鄭亦不同鄭謂周止祭四代及太祖  
合文武二世室為七廟王謂七廟為天子常禮二

世室在七廟之外二說之是非止據商書七世之廟一語可以斷之矣鄭信韋元成議而不見古文尚書故有此謬然王氏之說實祖禮器王制荀卿穀梁及劉歆馬融之言其來已久鄭何弗之信乎先儒言禘祫其說有三鄭康成謂祫大而禘小王肅張融孔晁之徒以為禘大而祫小賈逵劉歆杜預之徒以為禘祫一禮而二名以源鄙見論之賈劉杜之說為長也孔疏釋詩專據鄭箋為說而鄭

之言禘則有四焉圜丘祭天而配以饗一禘也南郊祭感生帝而配以稷二帝也大宗伯以饋食享

先王

即五年再殷祭

三禘也致新主于廟遠主當祧因大

祭以審昭穆四帝也

此喪畢吉祭之禘晉范宣子曰以寡君之未禘祀亦名禘

四者二祭天二祭廟皆得禘名矣周頌雖篇五年之禘也商頌長發南郊之禘也宋儒則從王義

臣謹案鄭王異同處多似王優於鄭而禘即祫祫

即禘則

臣

於春秋大事表主其說蓋以三年一祫



五年一禘遂至禘祫併在一年致有遠近之說紛  
紛陳氏所見與臣合矣

毛詩類釋卷六